


ALAHADY FAHA 30 MANDAVANTAONA - B



« Matokia! mitsangàna, fa antsoiny hianao » (Mk. 10, 49)

Ry Kristianina havana, izao Alahady izao no mamarana ny volana oktobra volan'ny raozery sy volan'ny misiona ka miaraka amin'i Masina Maria isika mitalaho ny fahasoavan'Andriamanitra handresy ny ratsy ka miroso amin'ny fiainam-baovao hahatonga antsika ho taranaka mpanorina tokoa. Tahaka an'ilay jamba voalaza ao amin'ny Evanjely ny tontolom-piainansika sy ny tontolo iainantsika ary ny tontolom-pinoanantsika ka very fanahy mbola velona isika tsy hitantsika izay aleha.

Niantso ilay jamba nikiaka sy nivavaka nanao tamin'i Jesoa hoe “ Ry Jesoa zanak'i Davida ô mamindra fo aminay”. Nositrarin'i Jesoa ilay jamba “ Mandehana fa ny finoanao no nahavonjy

anao”. Maniraka ansika mitsangana i Jesoa hijoro ho taranaka mpanorina tokoa, tsy amin'ny alalan'ny angovontsika fotsiny fa noho ny asan'ny Fanahy masina entanin'ny finoana sy fahasoavan'Andriamanitra isika mahatonga antsika ho taranaka mpanorina. Izany hoe mitoetra ao amin'i Jesoa isika ka itoeran'i Jesoa ny fiainantsika mahatonga antsika hamokatra be ka ho feno

Vakiteny I : Jer. 31, 7-9
Tononkira : Salamo 125
Vakiteny II : Heb. 5, 1-6
Evanjely : Mk. Mk. 10, 46-52

hafaliana ny fiainantsika. Amin'izao Alahady tsotra faha 30 mandavantaona izao dia atolotry ny Eglizy amintsika ny tena fototra hahafahantsika mivelona ny hoe mitoetra ao amin'i Jesoa ary hitoeran'i Jesoa ka mahatonga antsika hamokatra. Atolotry ny Eglizy androany amin'ny alalan'ny vakiteny ny kriterana hahafantarantsika fa velona ny finoantsika. Raha velona ny finoantsika dia mitoetra ao amin'i Jesoa isika ary itoeran'i Jesoa.

Amin'ny vakiteny voalohany sy ny Evanjely dia mampianatra antsika fa raha miantso an'I Jesoa isika dia Izy hampahiratra antsika ka manafaka antsika. Mila mihaino Azy isika. "Mihainoa ry Israely" Izany dia tsy hoe mitandre fotsiny fa sady mihaino no mampiditra ao am-po ary manatanteraka an'izay henoana. Izany no atao hoe finoana. Fantantsika fa tsy misy fiekem-pinoana ohatry ny ataontsika izao ny ao amin'ny Baiboly fa isika noho ny fandalinana ataontsika sy ny asan'ny Fanahy masina no nametraka ny fiekem-pinoana. Fa hatramin'ny voalohany raha niseho tamin'ny mpianany ka niova tarehy teo an-tendrombohitra i Jesoa dia nolazain'Andriamanitra i Piera, i Joany ary Jakoba "mihainoa fa inty no zanako malalako" izany koa no nataon'Andriamanitra tamin'ny vahoakan'Israely " Mihainoa ry vahoakan'Israely" Ary mbola izany koa no hiainantsika aorian'ny filankevitra pastôraly ka mahatonga antsika ho taranana mpanorina.

Matoa mivarilavo ny fiainantsika dia tsy manana ny "capacité d'écoute" tsy manana ny fahaizana mihaino araky ny voalazan'Evanjely isika. Ny fahaizana mihaino no mampiova ny fiainantsika ka hahatonga antsika hanana ny fiovana amin'ny tsara ka ho tena taranaka mpanorina. Izany no nampianarin'Andriamanitra ny vahoakny ary tohizan'i Jesoa amin'ny Evanjely sy mbola tohizan'ny Eglizy amin'ny vaninandro iainantsika izao. Izany no mahatonga antsika ho misionera raha mahay mihaino an'Andriamanitra isika, mahay mihaino ny zava-boahary ary mihaino ny manodidina antsika. Matoa isika mamotika ny tontolo dia noho isika tsy mahay mihaino ny zava-boahary fa manao ny saimpantantsika. Matoa mikorontana ny fiainantsika dia noho isika tsy mahay mifampitandre intsony. Amin'ny vaninandro iainantsika izao dia ny écouteurs no hita amin'ny sofintsika matetika ka tsy afaka mihaino zavatra hafa intsony na eny ambanivolo izany na eny antanandehibe, ka tsy misy intsony ny fahaizana mihaino ny hafa. Matoa mikorontana ny fiainakaviana, ny fanjakana, ny mpanao politika isankarazany, tsy misy intsony ny fahaizana mihaino.

Manambara fifampitokisana ny fahaizana mihaino, dingana amin'ny finoana izany satria misy fifanajana. Ambaran'ny Evanjely amintsika fa ny tena vokatry ny finoana dia ny fahaizana mihaino, raha mahay mihaino isika dia midika ny fahaizantsika mandrafitra ny fiainantsika ka hahatonga antsika ho taranaka mpanorina tokoa, ho taranaka izay mampihatra ny rariny sy ny hitsiny, mampanjaka ny fifankatiavana. Hoy i Jesoa "Tiavo ny Tompo Andriamanitrao, amin'ny fonao, ny fanahinao, ny sainao ary amin'ny herinao manontolo"; Manambara fa mivelona ny fihainoana izany sy manambara fa mitoetra ao amintsika Andriamanitra izany hoe i Jesoa mitoetra ao amintsika. Raha izy mitoetra ao amintsika dia mivelona tahaka an'i Jesoa isika ka manahaka ny fiainan'i Jesoa ny fiainantsika. Raha miova ny fiainantsika tsy ilaina intsony ny sorona dorana araky ny hafatry Jesoa ao amin'ny evanjely fa ny sorona dia ny fahaizantsika mifamela heloka sy mifamindra fo ka amin'izay folaka ny fiainantsika ka fianana mahazanak'Andriamanitra ny fianantsika.

Io ilay didy faharoa izay mitovy amin'ny voalohany dia "Tiavo ny namanao tahaka ny tenanao", tsy misy didy lehibe mihoatra ireo, raha mivelona an'izany ianao dia mivelona eo anivon'ny fanjakan'Andriamanitra. Io no ampianarin'i Md Joany antsika "Raha misy milaza azy ho tia Andriamanitra nefa mankahala ny mpiray tampo ara-pinoana dia mandainga izy". Raha ny eo akaikiny tsy tiany ataony ahoana ny ho tia an'Andriamanitra tsy hitany. Ny didy dia izay tia an'Andriamanitra tsy maintsy tia ny mpiray tampo aminy.

Raha te hijoro am-pinoana tokoa isika aoka hahay hihaino an'Andriamanitra, hihaino ny tontolom-piainantsika, hihaino ny manodidina antsika sy ny tontolo ianantsika dia ny zava-boahary, tsy maintsy izany no hivelomantsika ny finoantsika ka aoka amin'izao Alahady faha 30 mandavantaona izao hanehoantsika ny fahaizantsika miombona amin'i Jesoa.

Ry Jesoa Tompo Kristy zokinay ô, nasehona tamin'ny fiainanao izany fototra maha zanak'Andriamanitra izany, ny fifandraisana lalina tamin'ny Ray ary nanolotra ny ainao taminay ianao anambaranao ny fitavana anay, ampio izahay hahay hitoetra ao aminao ka hanana finoana velona izahay ho taranaka mpanorina tokoa ka hahay hampiakatra ny fiainanay araka ny sitrakao.
Amen

Mompera Arseveka Mgr Benjamin Ramaroson